

大德而後能得大德之臣君無大德則雖有大德之臣不能用之雖用之使不得盡展其德澤矣蓋同聲相應同氣相求雲從龍風從虎詩曰思皇多士生此王國自 上能先修己之德則賢人君子應時而出自古歷代用人得失其效專在於上也特進官尹漑曰凡易六十四卦皆以天理人事互相參言聖人垂法萬世何卦不切而乾坤二卦尤切於人君之體法大象云天行健君子以自強不息人君學問不息之功與天地無間而後有讀易之功矣○庭試入格生員安漢卿等各賜分有差○辛巳傳于政院曰洪詮妻允代罪雖似重而婦人之妬忌自古然矣古者士大夫妻以妬殺妾未聞有償命者况士族婦人已至三次殺明祜如綱常重事而數多訊之何如議于政府○夜坤方有氣如火○甲申政府堂上議啓曰洪詮妻獄事非他雜犯之例一時用藥殺四人情狀已著不可以士族婦人少有容貸當加刑取服依律處決傳曰依議○忠清道石城地震○乙酉 御朝講侍講官鄭彥慤曰陽